

Visoki predstavnik produžio zabranu raspolaganja državnom imovinom



Visoki predstavnik, Christian Schwarz-Schilling, je danas objavio Odluku kojom produžuje važenje državnog i entitetskih zakona, kojima se privremeno zabranjuje raspolaganje državnom imovinom, do 30. septembra 2007. godine. Visoki predstavnik je danas apelirao na vlasti Bosne i Hercegovine, Federacije BiH i Republike Srpske da postignu dogovor o raspodjeli prava i odgovornosti u vezi sa ovom imovinom prije tog roka.

Zabrana raspolaganja državnom imovinom, koja je prvobitno nametnuta 21. marta 2005. godine, ističe sutra (31. maja 2007. godine). Komisija koju je osnovalo Vijeće ministara BiH u decembru 2004. godine, a koja je imala mandat da utvrdi pravo nad državnom imovinom i da izradi nacrt zakona za upravljanje tom imovinom, nije uspjela u svom zadatku zbog nepopustljivosti na visokom političkom nivou koja je spriječavala bilo kakav napredak.

Državna Komisija je imala mandat da osigura da prava nad državnom imovinom budu raspodijeljena na način koji je u skladu sa odgovarajućim nadležnostima države, entiteta i Distrikta Brčko prema Ustavu. To je obično slučaj u decentraliziranim zemljama, ali zbog nivoa političke volje Komisija nije uspjela da postigne bilo kakav napredak.

Danas je visoki predstavnik pozvao da se vode pregovori i da

se potpiše sporazum o državnoj imovini između vlada najkasnije do 30. septembra ove godine. Visoki predstavnik je takođe pozdravio inicijativu Vijeća ministara da imenuje nove članove Komisije za državnu imovinu kako bi Komisija bila osnažena te pozvao na to da se proces završi što je prije moguće. Pored toga visoki predstavnik je apelirao na vlade da produže mandat Komisije za državnu imovinu kako bi ista mogla izraditi nacrt zakona u skladu sa sporazumom postignutim između vlada.

“Pošto ne postoje sveobuhvatni zakonski propisi koji utvrđuju podjelu nadležnosti u vlasništvu nad i upravljanju državnom imovinom bio sam primoran da intervenišem kako bih zaštitio interese cjelokupne zemlje,” rekao je visoki predstavnik danas.

Definiranje prava vlada države, entiteta i Distrikta Brčko nad postojećom državnom imovinom je i dalje značajan aspekt obaveza BiH da izradi i promovira tržišnu ekonomiju i njene integracije u evropske i atlantske institucije.